

গ্রন্থকার প্রণীত ।

- ১। কথানিবন্ধ—অনেকগুলি মনোহর উপন্যাস
সম্বলিত গ্রন্থ মূল্য ১ টাকা
- ২। কুলশর—কবিতা গ্রন্থ " ১ "
- ৩। যজ্ঞতন্ত্র— " " ১ "

নেং, কলেজ ষ্ট্রাটে এবং ২০১, কর্ণওয়ালিস ষ্ট্রাটে শ্রীযুক্ত
শুকদাস চট্টোপাধ্যায়ের মেডিকেল লাইব্রেরীতে পাওয়া যায় ।

এইগুলি সর্বত্র বই প্রসংসিত ।

পঞ্চক মালা

—*—

শ্রীবিজয় চন্দ্র মজুমদার
প্রণীত ।

1910.

Calcutta :
PRINTED BY P. C. DASS, AT THE
KUNTALINE PRESS,
01 & 02, BOWBAZAR STREET
AND
PUBLISHED BY SEN BROTHERS & Co.,
5, COLLEGE STREET.

সূচী ।

• বিষয় ।

পৃষ্ঠা ।

সুগত পঞ্চক—

মায়াদেবীর দেবপূজা	৩
দেবশিশু	৬
জাগরণ	২১
নির্বাণ	১৮
সুসমাচার	১৯

নারী পঞ্চক—

বৌ	২৩
শিশুর মা	২৫
মায়ের মা	২৭
প্রেম বিদ্যা	২৯
দেবী	৩৫

জীবন পঞ্চক—

তাণ্ডব নৃত্য	৩৯
শীত বাসরে	৫২
স্বর্গ	৫৪
মধ্যাহ্নে	৬৬
জীবন	৪৩

বিষয় ।

পৃষ্ঠা ।

দুঃখ পঞ্চক (গান)—

তোমার কুসুম কাননে	৫৫
সুখের ভরা বহিয়া	৫৬
পাখীর মত উড়ে যাব	৫৭
বাথা মরমে	৫৮
সাজিয়ে এনেছি	৫৯

সুখ পঞ্চক (গান)—

মম যৌবন	৬৩
কেন এত ভাবনা	৬৪
আর খুঁজিনে	৬৫
উড়ব আমি	৬৬
আসছে ভেঙ্গে	৬৭

স্মৃতি পঞ্চক—

প্রার্থনা	৭১
নব প্রভাত	৭৩
নব বর্ষে	৭৫
নিদাঘে	৭৬
শারদ প্রভাতে	৭৮

মোহ পঞ্চক—

কাল দুটি তারা	৮৩
রান্ধা ঠোঁটের হাসি	৮৪
মুগ্ধ	৮৬
অনুরোধ	৮৯
ললিতা	৯১

বিষয় ।

পৃষ্ঠা ।

প্রশস্তি পঞ্চক—

গুরু	২৫
কবি	২৬
সন্ন্যাসী	২৮
ঋষি	২৯
দেবী	১০০

কৌতুক পঞ্চক—

প্রতিবাদ	১০৩
বিরহে	১০৫
পুরুষসিংহ	১০৬
তাড়াতাড়ি	১০৯
দোষ নিজেই নয় গো মা	১১১

খেয়াল পঞ্চক—

খেয়াল	১১৫
সুরনারী	১১৬
ভালবাসি	১১৮
শারদা	১১৯
ছায়া	১২০
বছর চলে	১২২



ନୁଗତ ପଞ୍ଚକ ।

“ବୁଦ୍ଧବୀର, ନମୋତ୍ୟ-ଂଥୁ, ସବର ସତ୍ତାନାମୁତ୍ତମ,
ସୋ ମଂ ଦୁକ୍ଖା ପମୋଚ୍ଚସି, ଅଞ୍ଞଞ୍ଞମ୍ ଚ ବହୁକଂ ଜନମ୍ ।”

মায়াদেবীর দেবপূজা ।

“অগ্নিদেব, দেব প্রভাকর,
স্বর্ণ বর্ণে প্রদীপ্ত সুন্দর !
পুণ্যতাপে দগ্ধ কর পাপ ।
সুখসিন্ধু-নিধি চন্দ্র তারা,
কিরণেতে করুণার ধারা
বরষিয়ে হরিও সন্তাপ ।”

শুচিস্নাতা মায়াদেবী, কৌষিক বসনে
উজলি' সুবর্ণ কান্তি, বসি কুশাসনে—
বিরচি অঞ্জলি রক্ত কর-পদ্ম-দলে,
শুক-সুকোমল কণ্ঠ বেড়িয়া অঞ্চলে—
স্তুতি-অন্তে প্রণমিয়া দেবতা-চরণে
স্তুতি করিলা দৃষ্টি আয়ত নয়নে ।

পঞ্চকমালা ।

নিজ হাতে রাজরাণী ভিখারীর হাতে
দিবেন বসন অন্ন ; তাই, শুভ প্রাতে
দ্বারেতে দরিদ্র কত বসি' অপেথিয়া —
“দে বসন, দে মা অন্ন” কহিল ডাকিয়া ।
বসি' পুত্রার্থিনী দেবী পূজার ভবনে,
শুনিলেন “মা মা” ধ্বনি ভিখারী-বদনে ।

মাতৃসস্তাষণ কর্ণে মধু উগরিল ;
“এস বাছা” বলি যেন প্রাণ উত্তরিল ।
উছলিল স্নেহ-সুধা জগতের হিতে ।
চলিলেন ধীর পদে ভাবিতে ভাবিতে :—
“লালসা-বিলাসে তৃপ্তা নহেরে রমণী ;
এ জীবন ধন্য তা'র, হইলে জননী ।”

দরিদ্রে বিতরি' অন্ন বসন সুন্দর,
তৃপ্তি-সুখে পরিপূর্ণ করিয়ে অন্তর,
প্রবেশিতে কক্ষমাঝে হেরিলেন রাণী
রাজা শুদ্ধোদন দেবে । বক্ষমাঝে টানি
আদরে চুম্বিয়া স্নাত মুখপদ্য, পতি
কহিলেন, “একি দেবী-মূর্তি তব সতী !”

মাতৃহ-গোরব-স্নেহে পূর্ণ ছিল প্রাণ ;
অধর অমৃতসহ করিলেন দান
যৌবন-কুসুম-অর্ঘ্য পতি-পদ-তলে ।
ত্রিদিবে দেবতা-বক্ষে জগত-মঙ্গলে
উৎসরিল করুণার বিমল নির্ঝর ।
সুলভ প্রীতির মন্ত্রে দেবতার বর ।

দেব শিশু ।

কোলে করি' মাতৃহীন শিশুটি আদরে,
রাজা শুদ্ধোদন পানে চাহিয়া কাতরে,
অভাগিনী ভগিনীর কথা স্মরি' মনে,
কহেন গৌতমী দেবী, সজল নয়নে,

(মধুর করুণবাণী অধর স্পন্দনে) :-

“মহারাজ, কভু নাহি কহিও নন্দনে
ধরিনি জঠরে ওরে । দুর্ভাগ্য মাতার
শুনিলে ব্যথিত হবে শিশু সুকুমার ।

কহিতে কহিতে কথা মুছিয়া বদন,
পূরিলেন শিশু-মুখে ঘন পীন স্তন ;
বক্ষের তরল স্নেহ সূধা হ'য়ে ঝরে ;
তৃষিত অধর কচি, কাঁপে পয়োধরে ।

যৌবন-বসন্ত-কুঞ্জে প্রেম পুষ্পদল,—
ত্রিদিব দুর্লভ নব এ অমৃত ফল
প্রসবি' পড়িল ঝরি' অজানা ছায়ায় !
অভিভূত চিত্র আজি মায়ার মায়ায় ।

মনে মনে দেবতার চরণ বন্দিয়া,
গোতমীর আঁখি ধারা চুম্বনে মন্দিয়া,
কপোল-লম্বিত কেশ সরাসরে যতনে,
কহিলেন শুদ্ধোদন, রমণী-রতনে :—
“দেবী তুমি হে গোতমী, অনাথ-জননী ;
তোমারি কুমার এই নয়নের মণি ।”

সুধা-তৃপ্ত-কণ্ঠে শিশু পড়িল ঘুমায়ে
অতৃপ্ত নয়নে দেবী, বদন নুয়ায়ে,
হেরিতে শিশুর কান্তি জন্মিল বিস্ময় ।
দেবতা কি হবে শিশু ? মনেতে সংশয়
হেরিয়া অঙ্গের চিহ্ন ভাবেন আবার,—
“মহারাজ-চক্রবর্তী হইবে কুমার ।”
“হাতে পায়ে পদ্য আঁকা সোণার বরণে ;
যাচিবে নিখিল বিশ্ব শরণ চরণে ।”

অপার্থিব সুখ-রস উগলে অন্তরে ;
জাগরণে স্বপ্ন যেন শিরায় সঞ্চরে ।
দেবগণ ঢাকি’ তনু দীপ্তি আচ্ছাদনে,
গাহিল যেন রে গীতি বীণার বাদনে ।

সুর যেন সুর-নদী পুণ্যধারা ঢালে ;
তরঙ্গে তরঙ্গে বিশ্ব নাচে তালে তালে ।
করিছেন দেবগণ দেবের আরাতি ;
শিশু-কোলে ধ্যান-মগ্না দেবা প্রজাপতি ।

* * * * *

“আগত ভবে সুগত দেব, জগত তারিতে ;
হবে সুশীত তৃষিত নর করুণা-বারিতে ।
ব্যাধি ও জরা- -ব্যথিত ধরা,

বিষাদে আর কাঁদিওনা !

মুক্তি পাবে ক্ষুদ্রজন বুদ্ধ শ্রীপদে ।

দীপ্তপথ ভাতিবে চোখে ভ্রান্তি-বিপদে ।

সুখের আশে

মরণ-পাশে

জীবন কেহ বাঁধিও না ।

জাগরণ ।

যশোধরা ! বিশ্বভরা একি আর্তনাদ ?
পর্ণের কুটার কিম্বা স্নর্গের প্রাসাদ,
বাসনা-অনল-তাপে যাতনার ধূমে
কৃষ্ণকান্তি, শান্তিহীন । তবু, ভ্রান্তি যুমে
মুদিছে নয়ন নর, শয়ন পাতিয়া ;
ভীষণ দুঃস্বপ্নে পুনঃ শ্বসিছে কাঁদিয়া !

মথিয়া আনন্দ-গীতি রোধিয়া শ্রাবণ,
রোদনের ভীমধ্বনি অসীম গগণ
ব্যাপিয়া ভ্রমিছে ঘন গুরুনাদে ডাকি' ;
স্ফুরিছে বিদ্যুত দ্রুত বলসিয়া আঁখি ।
বেদনা-জলদ-জাল---নিবিড়, ধূসর,
টাকে আসি রবি শশী নক্ষত্র ভাস্বর ।
যন্ত্রণার অন্ধকার উজলিয়া তাপে,
বজ্রনাদে আর্তনাদ গরজিয়া কাঁপে ।

ভ্রমিতে জীবন-পথে যৌবনের রথে—
সারথী দেখাল মোরে,—চরিছে মরতে
জরা ব্যাধি মৃত্যু নর-গৌরবের দ্বারে ।
কে দিবে মানবে শান্তি ? কে তারে উদ্ধারে ?

মানবের আনন্দের ক্ষেত্র—মধুবনে,
হেরিলাম ‘মার’ আর ‘মার’-বধুগণে ।
নহেক সুন্দর তা’রা ; ভূষণে বসনে
প্রচ্ছন্ন করে গো অঙ্গ শীর্ণ অনশনে ।
বিবসনা বাসনার হাসি নাই মুখে,
নয়নেতে দীপ্তি নাই তৃপ্তি নাই বুকে ।

অবশা লালসা তথা অনবগুণ্ঠিতা,
বাঁধিয়া গলায় ফাঁস ধূলায় লুণ্ঠিতা ।
‘মার’-পূজ্যা লজ্জাহীনা হেরিলাম রতি,-
বিঘ্ন-পক্ষে নগ্নতনু কঙ্কাল মূরতি ;
বিভৎস উৎসব-শব টেনে ছিঁড়ে খায়,
গৃধিণী প্রেতিনী সম ক্ষুধার জালায় ।

মার-দত্ত বিত্ত তেজি শুদ্ধ নিত্যমণি
কোথা পাব ? কহ মোরে হে সতী রমণী ।
রোগ-শোক-জরা-মৃত্যু উতরিতে চাই ;
কহ কান্তে কোথা পন্ডা ! দেখিতে না পাই
খুঁজিয়া খুঁজিয়া সারা হতেছে অন্তর ।
সদ্ব্যজাত শিশুসম অসহায় নর !

তব প্রেমে, প্রিয়তমে লভেছি ইঙ্গিত,—
সেবা-সংঘমের মহা মহিমা-সঙ্গীত
গাইয়া ফিরিতে চাই সংসারের দ্বারে ।
স্বার্থ-নাশে সিদ্ধি আশে, শিখালে আঘারে ।

* * * * *

শুনিতে শুনিতে কথা অমৃত-নিচিত,
বক্ষেতে শয়ন পাতি—প্রেমেতে রচিত,
রাখি তথা তথাগতে দেবী যশোধরা—
চিন্তিল, “করুণা ধারে ধন্য হবে ধরা ;”
“ধন্য আমি, পুণ্যফলে পেয়েছি এ পতি,
জীবনে মরণে যিনি জগতের গতি ।”

* * * * *

নিশায় সেদিন দেবী যশোধরা
স্বপ্নে শুনিল বাণী :—
“কষায় বসনে সাজ তুমি হুঁরা
হবে যদি রাজ-বাণী ।
“নির্ঘোষে দূরে ধর্ম-চক্র,
রথেতে তোমার পতি ;
“জ্বালাও আলোক, সাজাও কক্ষ,
কেন বিলম্ব সতী ?
“নব উৎবাহে মিলিবে দুজনা—
পতি আসিছেন রথে ;
“স্বর্গে মতে বাজিছে বাজনা,
নর-কোলাহল পথে ।”
কহে যশোধরা :—“নিবাহ আবার ?
কেন না শুনিবু আগে ?
অলস অঙ্গ যুমে যে আমার,
অবশ প্রাণ না জাগে ।
বাজনা বাজায়ে ঐ আসে বর !
প্রদীপ হয়নি জ্বালা ;
সাজাব কখন ধূলাভরা ঘর ?
গাঁথিব কখন মালা ?

বিনয়-খচিত কোথা নীলাম্বরী ?

কোথা ত্রিরতন-হার ?

শীলের সূত্রে বাঁধিনি কবরী,

লুটিছে কেশের ভার ।

বল্লভ মোর আসিছেন হেসে

দুর্লভ নব সাজে ;

পদধ্বনি ওই শুনি দ্বারদেশে !

সঘনে বাজনা বাজে ।”

*

*

*

*

নিশীথে জাগিলা দেবী হেরিয়া স্বপন ;

কোথা চক্রবর্তী পতি ? নিঃপ্রাণ ভবন ।

শয্যায় নিদ্রিত পুত্র, না জানে বিষাদ ;

পতি দেবতার দত্ত মূর্ত্তি আশীর্ব্বাদ ।

কবে আসিবেন পতি, ফিরিয়া ভবনে ?

অপেক্ষিয়া জাগে সতী নব জাগরণে !

নির্বাণ ।

জিজ্ঞাসু— কপিল ঋষি-উষিত পুরী

ভূষিত করি কিরণে,
দেবতা ও কে আসিল লোকে সঞ্চরি ?
অমর বালা জ্যোতির মালা
দোলায়ে নভ-তোরণে
নমিছে রাঙ্গা আঙ্গুলে বাঁধি অঞ্জলি !

জাগ্রত— কুমার আজি রাজাধিরাজ-

বেশে প্রবেশে ভবনে ;
দেব ও দেবী, এস গো অভিনন্দিতে ;
তরিবে যদি ভব জলধি
হেরি স্নগতে নয়নে,—
জগতজন, এস, চরণ বন্দিতে ।
(কথা)
শুদ্ধোদন, দেবী গোতমী
লভি অমনি বার্তা,—
আকুল আঁখি জুড়াল, দেখি নন্দনে ।

মরণ-গত . অমৃত-পথ
 হেরিল যেন আত্মা ;
সুধার ধারা ঝরে অধীর ক্রন্দনে ।
সজল আঁখি যুগল মুছি—
 অর্দ্ধ-অবগুষ্ঠিতা,—
হেরি' পতির জগদতীত দীপ্তি,
চরণ মূলে নয়ন তুলে
 রহিল ধূলি-লুপ্তিতা ;
শাক্যকুল লভিল নব তৃপ্তি ।
উদ্ধোধিয়া মুগ্ধ প্রাণী
 বুদ্ধবাণী স্করিল ;
ঝরিল ভবে স্নিগ্ধ নব শান্তি ;
বিরহ-শোক- বিগত লোক,
 জীর্ণ জরা মরিল ;
নাহিরে দেহে শ্রান্তি—মনে ভ্রান্তি ।

* * * *

(শুদ্ধোদন)

গামি জনক ; পালক তুমি !
 কুল-পাবন পুত্র !
শুষ্ক মরু, করুণাধারে ভরিলে ।

মুছিয়ে বাধা, আঁধার ধাঁধা,
 অন্ধে দিলে নেত্র :
জীবন-তরু তরুণ করি গড়িলে ।

(গোতমী) (১)

এস, নয়ন পুতলি স্মৃত,
 উতলা চিত মাঝারে !
করিয়াছিলে স্তম্ভপানে ধন্যা !
আজি যে তব ধম্মে, নব
 জন্ম লভি', বাছারে,
হইনু,—লোক জনক ! তব কন্যা !

(কথা)

শ্রীপদ-সেবা করিতে যেনা
 ছিলরে অধিকারিণী.....
অগাধ যা'র চিত্ত ভরা ভক্তি,
চাহি' শ্রীমুখ পানে, সে মুক-
 ভাষায় যেন কামিনী
যাচিল প্রাণে প্রাণেশ-সেবা-শক্তি ।

(১) এই স্থানের সম্পূর্ণ ভাবটি দয়ং দেবী গোতমী রচিত গাথা হইতে গৃহীত ।

যাচিল, প্রিয় রাহুল তরে,
বহুল প্রীতি-বিত্ত,
বিনয়ে শীলে ভূষিতে শিশু সন্তান ;
যেন রে স্মৃত, সাধনা-পূত
দৃষ্টি লভি' নিত্য,
পতির মত লভে অমৃত নির্বাণ ।

* * * *

(গাথা)

গাহে কাশ্যপ মুনি(২)শাস্ত্রত বাণী,
বিস্মিত শুনি বিশ্ব ।
রাজা অধিরাজ, ভিখারী-সমাজ,
হইল সুগত-শিষ্য ।
ভগে পুণ্য বিনয়(২)বর্ণন করি
অগ্রগণ্য উপালি(২) ।
কি গৃহী, শ্রমণ, কিবা ব্রাহ্মণ,
ধন্য শুনি সে গাথালী ।
কহে আনন্দ(২) দেব-বন্দিত কথা ;
স্তুতিত নর, মন্ত্রে ।

(২) কাশ্যপ, আনন্দ ও উপালি, ভগবানের প্রধান শিষ্য ত্রয় । তাঁহারাষ্ট বিনয় পিটক, শ্রুতি পিটক ও অভিধম্ম পিটকের পাঠ নিদ্বিষ্টে করিয়া গিয়াছেন ।

কুম্ভমালা ।

অতীব শুদ্ধ বিবিধ সূত্র(২)

ধ্বনিত হৃদয় যন্ত্রে ।

হে খের খেরী(৩)পূত গাথা অগণন ।

বাধা কোথা ব্যথা ভয়ে ?

জীবনে বর্ষ্য শ্রীঅভিধম্ম(২),

জন্ম-মরণ-জয়ে ।

(৩) জ্ঞান-বুদ্ধ পুরুষ ও রমণীর নাম খের ও খেরী ; ইহাদের গাথা খুদক নিকায়ে আছে ।

সুসমাচার ।

১

বোধি দ্রুম-তলে মুক্ত শুদ্ধ

দেব অমিতাভ অমৃত বুদ্ধ ।

নর-হিত তরে উদিল ধর্ম,—

লুকানো মন্ত্রে বেদ নাই !

বলি, হোম, যাগ, দূরে পড়ে থাক ;

অনলে, সমিধে, মেধ নাই ।

২

দ্বিজ বা শূদ্র সাধু বা পতিত,

কি পুরুষ নারী, এসগো ত্বরিত ;

পরহিতে সাধ পরম কর্ম,—

পুণ্য আনিবে বেদনা-ই ।

করি' প্রাণদান পাবে নব প্রাণ,

প্রীতি বন্ধনে ছেদ নাই ।

৩

আকাশের মত অসীম উদার,
নির্বাক-পথে সম অধিকার ।

শুনি সমাচার, তৃপ্ত কর্ণ :-
নরে নরে কোন ভেদ নাই. ;
ব্যাধি, জরা, দুখ, মরণ, আশুক--
খেদ নাই, তাহে খেদ নাই

बाली पकक ।

বৌ ।

উলুধ্বনি করলো সবে বাঁচি বাজা শাঁখে ।

আমার মাগিক্ সোণা, বৌটি—চাঁদের কোণা—

আকাশ থেকে পেড়ে এনে দিচ্ছে তুলে মাকে ।

বরণডালা হাতে, আয়লো সাথে সাথে ;

লক্ষ্মী এলো সাগর থেকে, সুধার কলস্ কাঁকে ।

ঘরে এসো ; মরি, লক্ষ্মী পূজা করি,

সিঁদুর দিয়ে সিঁথী ভোরে তুলি বুকের তাকে ।

পরের মেয়ে ? ওমা ! কথা বলি তোরা কাকে ?

পরের বাছা হোলে, তুলে নিতে কোলে—

উঠত কিরে স্খের ঢেউ বুকের থাকে থাকে ?

আঁখি-পদ্ম-দলে শিশির কেন ঝলে ?

মা ফেলে যে এলে তাই, ভাব্ছ কিগো তাকে ?

চাঁদ মুখেতে “মা” আমায় বলনা !

মুখ ভোরে যাক্ দুজনেরি মধুর “মা” “মা” ডাকে ।

পঞ্চকমালা

আমিও মা ফেলে এসে আজ পেয়েছি মাকে ।
তুমিও পবে মা ! দুঃখ রবে না,
বাঁধবে যবে ঘর খানি গো প্রেমের সূতার পাকে ।
এসো বাছা ঘরে, আপন কর পরে ।
উলুধ্বনি দেলো সবে বাঁধি বাজা শাঁখে ।

শিশুর মা ।

“তিনি” আমায় বলেন, আমি সুধাময়ী রানী ;
প্রাণে আমার সুধা ছিল, সত্য বলে’ মানি ।
টেউ খেলিয়ে যতটুকু লাগে ঠোঁটে, চোখে,—
সেই টুকুত “তিনি” পান্ করেন ঢোকে ঢোকে ।
প্রাণের বাসা-ঘরে সুধা ছিল জমাট-করা,—
সেই সুধাতে মোদের জাদুর অঙ্গ খানি গড়া ।

আমি যবে বাহু-পাশে বেঁধে ফেলি “তায়,”
অতি ঘন স্বপ্ন নাকি জড়ায় তাঁহার গায় ।
“তারে” যখন বাঁধি, আমার বুকে মোহ কাঁপে ;
বুঝেছি,—সে পরাণ ভরা স্বপনেরি চাপে ।
প্রাণ-কোটরে শিশুর নীড়ে স্বপ্ন ছিল ভরা,—
সেই স্বপনে মোদের বাছার অঙ্গখানি গড়া ।

নয়কো মিছে, বলেন “তিনি” আমায় বেসে ভাল,
আমি নাকি তাঁদের মত আঁধার ঘরের আলো ।
এই কপোলের কূলে কূলে পুলক যখন জাগে,
সত্য দেখি, আলোর ছিটে তাঁর কপোলে লাগে ।

পঞ্চকমালা ।

বিজন প্রাণের মাঝে আমার ছিল আলোর ঝরা,-
সেই আলোকে মোদের চাঁদের অঙ্গ খানি গড়া ।

মানি বটে,—ফেলে দিতে শিশুর মুখের মাটি,
চোদ্দ ভুবন নন্দরাণী দেখেছিল খাঁটি ;

শিশু যখন হাসে,—তাহার দুখে দাঁতের কোলে
লক্ষ্য করি, শোভাভরে লক্ষ ভুবন দোলে ।

সারা বিশ্বের কচি শোভা ছিল জড় করা,—
সেই শোভাতে মোদের শিশুর অঙ্গখানি গড়া ।

মায়ের মা ।

কোলের বাছা কোলে নিয়ে আয় মা আমার কোলে !

কটি বছর হল গত—

যেন কটি যুগের মত ;

যুগ যুগান্ত যেন অন্ত কত চিন্তার গোলে !

ছেলে বেলার কথা তোমার

জাগ্ছে মনের মাঝে আবার ;

তুই ছিলি তোর জাদুর মত ; জানাই তা কি বোলে ?

তেম্নি বরণ, তেম্নি গড়ন,

তেম্নি হাসি, তেম্নি ধরণ ।

আয়রে, সোণা, মাণিক দিয়ে পূরাই বৃকের খোলে ।

ঘরে দোরে তোমার মায়া

জড়িয়ে আছে ছড়িয়ে ছায়া,

ওঠে কেঁপে বুকটা চেপে তোমার কথা হোলে ।

তোমারি সে খেলার ঘরে

খেলনা আছে শিশুর তরে ;

আঙিনাতে দোলনা তোমার, আপন মনে দোলে ।

পঞ্চকমালা

আলো পেয়ে সাজল ধরা,
ফুল ফুটেছে বাগান ভরা ;
তোমার হাসি ভালবাসা কেউকি হেথা ভোলে ?
ছাড়িয়ে আমার বন্ধ-সীমা,
স্থখে ছিলে তুমি কি মা ?
থাক্ সে কথা ; দুঃখ ব্যথা দূরে গেছে চলে ।
আজ্কে শোয়া বসা মানা ;
কাঁধে তুলে তাঁদের ছানা,
জ্যাছনা দিয়ে গা ভেজাব, প্রাণটা যাবে গলে' ।
কোলের বাছা কোলে নিয়ে আয় মা আমার কোলে

প্রেম বিদ্বা ।

(১)

আগ্নিন মাসের ভোরের বেলায়—

বাগান তখন ফুল-পরা,

সতেজ শ্যামল তরুর তলায়

গঙ্গা ছিল কুল-ভরা,---

দাঁড়িয়ে তুমি (আত্ম-মগ্ন)

শিউলি-গন্ধি বাতাসে,

খুঁজতেছিলে নিশার স্বপ্ন

আশায় এবং হতাসে :

ক্ষণেক পরে উঠলে কেঁপে---

উঠলে ফেঁপে সহসা,—

তরঙ্গতে অঙ্গ ছেপে

গঙ্গা যেমন বিবশা ।

ডাকল পাখী মিঠে গলায়

তুমি কাণে ভুলে না ;

নাচল ছায়া তরুর তলায়

তুমি তাতে ভুলে না ;

পাতার গায়ে বাতাস বেজে

উঠল ঘন স্বনে গো ;

তোমার পানে (ফুলে সেজে)

চাইল তরু বনে গো ।

তুমি ছিলে বগ্যা-জলে

কূলে কূলে ফুলিয়া ;—

গঙ্গা সম গেলে চলে’

তরঙ্গতে দুলিয়া ।

তাহার পরে সূর্য্য-করে—

ঝলকিল ধরণী ;

শাদা মেঘের মতন্ বেগে

গঙ্গা-বক্ষে তরণী,

চল্ল ছুটে ; উঠল ফুটে

চূর্ণ ঢেউএর বুদ্ধবুদে,—

তারার কণা, হীরের দানা,

গাঁথা সোণার বিদ্যতে ।

প্রেমের বানে, সুখের টানে,

তুমিও গেলে অন্নি ত,—

প্ৰীতির ধারার মাঝে ধরা

করি’ প্রতিবিশ্বিত ।

নিরবধি গঙ্গা নদীর

মতন যদি বহিতে,
ভোরের গাথা, কুলু কথায়
নিত্য যদি কহিতে,
সিন্ধু-পানে স্রোতের টানে
চলে যেতে ছুটিয়া ;
হীরে গাঁথা ঢেউএর মাথায়
উঠত আলো ফুটিয়া ।

* * * *

ক্ষীণ-ধারায় বালির কারায়
গড়িয়ে অতি মন্বরে,
তিলে তিলে শুকিয়ে গেলে
শুষ্ক মরু-প্রান্তরে ।
আজো ভোরের বাগান ভোরে'
ফোটে ফুলের কলি ত ;
শিশির-সিক্ত বায়ু, নিত্য
ফুলের গন্ধে দলিত ।
গাছের তলায় ছায়া খেলায়
স্বপ্নে রচি জড়িমা,
গঙ্গাজলে উছলে চলে
কিরণ-মাথা গরিমা ।

তোমার ব্যথা তোমার কথা
নেইক কারো স্মরণে ;
মাটির পৃথ্বীর দৃঢ় ভিত্তি,
মানুষ মরে মরণে ।

২।

মাটির ভাণ্ড তাপে গড়া, সুখের বাঁধন পাপের দড়া ;
নিশ্চুম এ বিধি অতি অলংঘ্য ।
প্রাণটা যাহার বিশ্ব জোড়া, তারি বেশী কপাল্ পোড়া,
প্রীতির সুধার ধারে করে কলঙ্ক !
গভীর শোকে ব্যথিত প্রাণে থাকতে চেয়ে' অতীত পানে,
মুখখানি লুকিয়ে ঘরের কোণে গো !
পায়ে ঠেলে তোমায় লোকে দেখ্ত চেয়ে স্বপ্নার চোখে ;
মোদের চেয়ে বাঘ-ভালুকো বনে গো—
মনে হয় যে ভাল বরং। ধিক্ মানুষের পুণ্য ধরম্ !
পরকে দলে' চরণতলে, সাধুতা ?
যত ভণ্ড যত চোর, গলায় তাদের তত জোর ;
নীরব সাধুর মাথায় তাদের পাদুকা !

৩।

এড়িয়ে ভবের দুঃখ নানা, ছড়িয়ে তোমার প্রেমের ডানা,
 উড়ে গেছ প্রেম-বিদ্বা, কোথা সে ?
 গঙ্গাতীরে ভোরের বেলায়, শিউলি-গন্ধি ছায়ার তলায়,
 খুঁজেছিলে যারে আশায় হতাশে,
 আজকে আবার শরৎকালে পাখায় পাখায় তালে তালে,
 তারি সাথে যাচ্ছ উড়ে সুদূরে ?
 ভবের ছালা ফেলে পিছে, জন্ম মৃত্যু রেখে নীচে,
 পেয়েছ কি প্রেম পুণ্য শুধুরে ?

৪।

তুমি	চলে গেছ বোন্	না জানি সে কোন্	রাজ্যে !
	ফেলে গেছ হায়	শিশু অসহায়	আজ যে ।
তুমি	ভুলেছ কি তার	কাণ করুণার	ক্রন্দন ?
	ছোট বন্ধের	মুদু দুঃখের	স্পন্দন ?
তুমি	ভুলেছ ব্যাধের	গুরু আঘাতের	
		স্মৃতি কি ?	
	পেয়েছ তোমার	চির সাধনার	
		প্রীতি কি ?	
তুমি	চলে গেছ বোন্	বহিয়ে জীবন-	
		বাহিনী ;	
	ফেলে গেছ ঢের	দীর্ঘ প্রাণের	
		কাহিনী ।	

(৫)

তোমার দুঃখ ফুরিয়ে গেছে,

জ্বালা গেছে জুড়িয়ে ।

এখন তোমার ব্যাথার, দুঃখের, ত্যক্ত অশ্রু, রক্ত বৃকের,

পাষণ থেকে মুছে চেষ্টে

রাখছি আমি কুড়িয়ে ।

কুড়িয়ে ইতিহাসের খাতা, জুড়ে নিয়ে ছেঁড়াপাতা,

শোক-বিদ্ব-অনুরাগে

পড়ছি প্রাচীন যাতনা ।

মুছে গেছে অনেক লেখা ; লুপ্ত দুঃখের শীর্ণ রেখা

ফুটিয়ে নিয়ে কালো দাগে

কচ্ছি নানা ভাবনা ।

দেখছি চেয়ে ফিরে ফিরে --- কঠোর সমাজ-শিলার শিরে

প্রীতির স্মৃতি-ধ্বজা যথায়

রেখে গেছ উড়িয়ে !

অশ্রু গড়ায় আমার চোখে, ঘণার হাসি হাসে লোকে ;

তোমার আজকে চিন্তা কি তায় ?

ভাবনা গেছ পুড়িয়ে ;

তোমার দুঃখ ফুরিয়ে গেছে

জ্বালা গেছে জুড়িয়ে !

দেবী ।

এত তুমি সহিতে পার দুঃখ জ্বালা,
কচি কচি ফুলে রচা বক্ষে বালা?

কাননে,—আমার তরে,
ফুটিয়ে কাঁটা করে,

তুলে দাও পুষ্পরাশি, সাজিয়ে ডালা!

গরলে মিটিয়ে ক্ষুধা,—

সরলে ! সুখের সুধা

ঢালিয়ে তৃপ্ত করা, তোমার পাল।

ও চুমে আমরা বাঁচি ;

তুমি নেও মরণ যাচি !

মৃত্যু কিগো তোমার বৃকের স্নিগ্ধ মালা

जीवन संकल्प ।

তাণ্ডব নৃত্য ।

অঙ্গে বিভূতি অজিন-বসন--

হেরগো সৃষ্টি মণ্ডপে,

সঙ্গে অযুত ভূত প্রেতগণ—

ভৈরব নাচে তাণ্ডবে ।

গম্ভীর গুরু ডমরু বাজিছে,

ফণী দোলে তালে উল্লাসি ;

নন্দীর করে পটহে নাদিছে :—

“বোম্ বোম্ হর সন্ন্যাসী ।”

অনল-দীপ্ত দ্বাদশ সূর্য্য

উর্দ্ধ গগনে স্তম্ভিত ;

প্রবল ঝটিকা বাজায় তূর্য্য,

শৈল সিন্ধু কম্পিত ।

বিরচি গরলে অর্ঘ পাণ্ড,

বাসুকি উঠিল নিঃশ্বাসি ;

উপছি পাতাল উঠিল বাণ্ড—

“জয় জয় হর সন্ন্যাসী ।”

বক্ষে শঙ্কা জাগিল চকিতে,—

চমকে ইন্দ্র চন্দ্র ;

যক্ষ রক্ষ বিহ্বল চিতে

ভুলিল রক্ষা মন্ত্র ।

রচেরে স্তোত্র দেবতাবর্গ—

উচেরে বাণী বিন্যাসি' ।

নাচেরে রুদ্র মাতায়ে স্বর্গ ;

“বোম্ বোম্ হর সন্ন্যাসী ।”

অগণিত লোকে বাজে বাদিত

গরজি অধিক গরবে ;

দ্বিগুণিত ভূত ফণীর নৃত্য,

ভীম তাণ্ডব পরবে ।

তুলিল গঙ্গা ফেনিল লহরী

জটায় জটায় উচ্ছাসি ;

ঘুরিল ত্রিশূল গগন উপরি,

“জয় জয় হর সন্ন্যাসী ।”

আজি যে তোমার নৃত্য হেরিয়া

তোমারি চরণ প্রান্তে,

নাচিছে বিশ্ব, শূন্য ঘেরিয়া—

আলোক বিকাশি ধান্তে ।

অশিব মগিয়া মঙ্গল-গাথা

উঠিছে ; শুনিছে বিশ্বাসী ।

হে শিব, সর্ব, বিশ্ব-বিধাতা !

“বোম্ বোম্ হর সন্ন্যাসী ।

শীত বাসরে

শুষ্ক পত্র মর্ম্মরিয়া নিশ্বসিছে কাননে পবন,—

কোথা সে শারদ শ্যামলতা ?

কোথা সে বসন্তভুক্ত অতি স্নিগ্ধ ফুল উপবন ?

পরিমলে কুসুমিতা লতা ?

প্রকৃতির প্রফুল্লতা, সুখগাথা, লুকাল কোথায়

শীত-ক্লিষ্ট নিস্তরক বিজনে ?

যৌবন গিয়াছে মরে, মর্ম্মভরা প্রেমের ব্যাথায় ;

জরা আজি বিচরে জীবনে ।

আসিবে না সে যৌবন, ফিরে নিয়ে সুখ-উন্মাদনা ?

কেন তারে চাও তুমি কবি ?

শ্বসিওনা বহি বুকুে সুষমার বিরহ-বেদনা,

ভোল সে কোমল শ্যাম-ছবি ।

তীব্র দাহে কোথা তৃপ্তি ? ক্ষিপ্ততায় কোথা প্রফুল্লতা ?

বাঁধ আজি স্থিরতায় প্রাণ ।

জলদ-গর্জনে প্রাণে হানে ঘন দীপ্ত বিদ্যুল্লতা ;

কি লাভ, বিলাপে গাহি গান ?

দুঃখ শোকে নিপীড়িত, প্রপীড়িত শত অত্যাচারে,
 ঘরে ঘরে কাঁদে নর নারী ;
 সুগতের মুক্তি-মন্ত্র শুনাইয়া শান্ত কর তারে ;
 কাছে গিয়ে মোছ অশ্রুবারি ।
 উন্মনা কল্পনা নিয়ে, ওহে কবি, রচিয়োনা গান ;
 দীপ্তি ওর---চঞ্চলতা টুক ।
 কোরো না উন্মাদ তুমি ক্ষিপ্তস্বরে বিশ্বেব পরাণ ;
 বিলাস-লালসা নহে সুখ ।

হোক শুষ্ক, কিম্বা পুষ্পে সুভূষিত যত তরুণতা,
 শরত-বসন্ত-বর্ষা-শীতে ; --
 চঞ্চল বাসনা সহ ঝরিয়া পড়ুক তরুণতা ;
 আজি তায় দুঃখ নাই চিতে ।
 মেঘ-মুক্ত প্রশান্ততা দীপ্ত হোক প্রীতির কিরণে,
 ক্ষুদ্র সুখ-দুঃখ উড়ে যাক ;
 নবজন্ম লভি' প্রীতি,--স্বার্থের মরণে--
 বক্ষ তার বিশ্ব জুড়ে থাক ।

স্বর্গ ।

(১)

ওগো উর্দ্ধলোকে স্বর্গ কোথা—

চির সুখের নগরী—

কৈলাসের আকাশ করি দীপ্ত ?

যুক্তদেহে আসীন যথা

শঙ্কর ও শঙ্করী,

চরণ-তলে সিংহ বলদৃপ্ত ?

(২)

তথা নবীনা নাকি লতিকা যত

নব কোরকে পল্লবে ;

সুখের চাপে সঘনে কাঁপে পর্ণ ;

কুসুম ফোটে প্রেমের মত

মোহিয়া দেব-বল্লভে,

বিকশে দলে আশার শত বর্ণ ।

সুখ- স্বপ্নমাখা আলোকে ভাতে

তটিনী চির রঙ্গিনী,

লহরী-পরে বিহরে নব সুষমা ।

কিন্নরীরা বিহগ সাথে

সঙ্গীতের সঙ্গিনী ।

যামিনী তথা নিত্য রাকা-ভূষণা

(৩)

যথা জীবন বাঁধে পুরুষ নারী

অটুট প্রেম-প্রতানে,

চরণ-তলে দলিত রিপুবর্গ ;

আলোক ভাতে, সুখ বিথারি,

ভবনে আর পরাণে ;

বিরাজে সেথা চির সুখের স্বর্গ ।

নাহি যৌবনেতে চঞ্চলতা ;

চিত্তে চির তুষ্টি ;

হাসির গায়ে চন্দ্র চির অক্ষিত ।

স্নিগ্ধ রসে আশার লতা

নিত্য লভে পুষ্টি ;

প্রেমের ফুলে মাধুরী চির সঞ্চিত ।

মধ্যাহ্নে ।

শরতের দ্বিপ্রহরে, সুধীর সমীর-পরে
জল-ঝরা শাদা শাদা মেঘ উড়ে যায় ;
ভাবি, একদৃষ্টে চেয়ে — যদি উদ্ধ পথ বেয়ে
শুভ্র অনাসক্ত প্রাণ অভভেদি' ধায় !

ঝরে যায় অশ্রুজল, বেদনার কল-কল,
অধীর বিদ্যুৎ-দীপ্তি, দৃপ্ত গরজন !
বাসনা-বন্ধন ছিঁড়ে, স্নিগ্ধ নীলিমার নীরে
ধীরে ধীরে শূন্য ঘিরে করি সন্তরণ ।

অতি স্তব্ধ বন-ভূমে ছায়া আছে শুয়ে ঘুমে,
সানুতলে সূর্য্যকর তলসে লুটায় ;
তুঙ্গ শৃঙ্গ-শিরে নীল অতি গাঢ়, অনাবিল ;
সুগতের ধ্যান যেন জগৎ ফুটায় ।
পাখা দিয়ে বিশ্ব জুড়ে, বসে আছে শৈল চূড়ে
অতিকায় প্রশান্ততা ; স্তব্ধ চরাচর ।
এড়াইয়ে দুঃখ শোক, স্বর্গ আর পরলোক,
স্বাভব জন্ম আজি অজর অমর ।

মিলাইয়ে গেছে আধা— জল-ঝরা মেঘ শাদা,

শরতের দ্বিপ্রহরে তুঙ্গ শৈল-গায় ।

গাঢ় নীলে শাদা দাগ্ আরো মিলাইয়ে যাক্ :

আমি যাই মিশে, ভেসে, সৌমাহীনতায় ।

ক্ষুদ্র ক্ষুদ্র স্মৃতি, আশা, বাসনার ভালবাসা,

ঝরে যাক্, মরে যাক্, আত্ম-বেদনায় ।

চরণে বন্ধন নাই, পরাণে স্পন্দন নাই ;

নির্নর্যে জাগিয়া থাকি স্থির চেতনায় ।

জীবন ।

১। গ্রন্থ ।

(১)

সুদৃঢ় গৌরবে বাঁধা গ্রন্থ মনোহর ;
সম্পদের স্বর্ণজলে নামের অক্ষর
দীপ্ত তাহে । লুক্ক মনে আগ্রহের ভরে
তুলিয়া লইলু গ্রন্থ কোলের উপরে ।

উদঘাটিতে জীবনের সুসম্বন্ধ খাতা —
দুঃখ কাহিনীর এক কোণাভাঙ্গা পাতা
প্রথমে সম্মুখে মোর পড়িল খুলিয়া ।
এ স্মারক চিহ্নে যাই গৌরব ভুলিয়া ।

(২)

লিখেছিলা বসি বসি যত্নে অযতনে—
কভু স্বপ্নদৃষ্ট কথা ; কিম্বা জাগরণে
অনুভূত বিষাদের ছোট ছোট গাথা,
কুড়ায়ে কুড়ায়ে পথে যত ছেঁড়া পাতা ।

এত ছিন্ন, তবু তারা আছে সুসজ্জিত,
দেব-আশীর্ব্বাদ-সূত্রে একত্র গ্রথিত ।
তোমারি চরণতলে লহ দেব, টানি —
তোমারি করুণা-পূত ছিন্ন গ্রন্থখানি ।

২ । সুখ ।

(১)

শ্রম-খিন্ন হয় তনু উৎসব-পরবে ;
উৎকর্ষায় কাটে দিন, লভিতে গরবে
সকলের পুরোভাগে আসন সুন্দর ।
উৎসাহের অভিনয়ে কল্পিত অন্তর ।
সযত্নে উৎসব-অন্তে শুষ্ক পুষ্পগুণি,
নৃত্য সঙ্গীতের স্মৃতি সহ রাখি তুলি ।
সদৃজাত বেদনার বাসি-অনুভবে,
পরম সম্ভোগ সুখ জীবন-পরবে ।

(২)

ঘুরিয়া আবর্ত-চক্রে হের স্রোতস্রতা
আছাড়িছে অঙ্গখানি উপল-বিষমে ;
বহিয়া বর্ধিত বেগে, তাহে সেই নদী
সংগ্রহিছে নবশক্তি আঘাত ভীষণে ।
আছাড়িয়া পড়ি মোরা কন্ম্ব-শিলাপরে,
বুদ্বুদ তুলিয়া দুঃখ মরে কলকলে ;
জীবন-বাহিনী বহে উচ্ছ্বাসের ভরে ।
আঘাত-গোরবে সুখ জাগে নব বলে ।

৩ । কীর্ত্তি ।

(১)

“কীর্ত্তিমান চিরজীবী” । মরণের পরে
লেখা থাকে যদি নাম, অক্ষয় অক্ষরে—
আমার অক্ষরময়ী কীর্ত্তির ফলকে !
আলোকের বর্ণে নর-নয়নে ঝলকে
নিত্য যদি সেই লিপি !

“ঠিক তাই হবে ।”

সমালোচকেরা মোরে কহিলেন সবে ।
রবে পরাজিয়া মৃত্যু, কীর্ত্তির পাষণ ;
মৃত্যু আলিঙ্গিয়া মোর হবে অবসান ।

(২)

অতীতের অশ্রুহাসি গাঁথিয়া মালায়
গলে পরি আসি মোরা নবীন ধরায় ।
আমাদের বিষাদের আনন্দের গাথা,
ভবিষ্যৎ মহাকাব্যে রবে সব গাঁথা ।

জীবন যঁহার কীর্ত্তি, সেই কীর্ত্তিমান—
এ যুগের ভিত্তি-পরে বিশাল মাহান
রচিবেন মহা সৌধ, নবীন ভুবনে ।
কালজয়ী হব মোরা কালের জীবনে ।

৪ । আশা ।

(১)

“জীবনের পরে আছে নবীন জীবন ।
“উৎকর্ষার নিদ্রা আর যাতনা স্বপন,
“ক্লান্তিপূর্ণ জাগরণ, লভিবে বিরাম ;
“পাবে আভিমত তৃপ্তি ক্ষুদ্র এ পরাণ ।”

মৃত্যুর ভীষণ পুরী অন্ধকার কারা ;
নিরুদ্ধ পবনে কর্ণ শ্রুতি হয় সারা ।
বিবর্ণ সূবর্ণ কান্তি মলিন ছায়ায় ।
দীপ্ত হবে আশা তথা আলোক-আভায় ?

(২)

যুগ যুগান্তের পরে ভ্রমুরে রক্ষিত
অস্তিকণা হবে মোর যত্নে পরীক্ষিত,
গণিতে কালের আয়ু, নরতত্ত্ব কথা ;—
দুর্নৈমিত্ত্য হইবে যবে মানব-সভ্যতা ।
কোথা রবে প্রেম মোর, অস্তি যার দেহ ?
কোথা রবে আমি মোর, প্রেম যার গেহ ?
পাষণের বিশ্ব হবে শ্মশানে অক্ষয় !
লভিবে নির্বাণ শুধু প্রাণ প্রেমময় ?

৫। সাধনা।

(১)

যতনে দুহাতে মুছি' অঙ্গ হতে কালী,
করি কলঙ্কিত মোর করতল খালি।
প্রক্ষালিতে হস্ত, ঢালি অনুভাপ-জল ;
ধূলায় জনমে তাহে কর্দম কেবল।

উজ্জ্বল বিমল পুণ্য শুভ্র অনিবার
কোথা সে তাপস ঋদ্ধি - সিদ্ধি সাধনার ?
ধূলি-বিনিময়ে মোরা সাধনার নামে
ধূলা মাঝে লভি পঞ্চ এ জগত-ধামে।

(২)

হাসি খেলা, ভালবাসা, আনন্দের গান,
রোদন, বিরাগ, ক্রোধ, কিস্বা অভিমান,
সাগরে তরঙ্গসম মথিয়া জীবন,
তুলিয়া গরল, তাহে করিছে সৃজন
দেবতা-বাঞ্ছিত সুখা পরাণে পরাণে ;
অমরত্ব লভে নর সে অমৃত পানে।

জনমি জীবন মাঝে সহজ সাধনা,
আপনি সৃজিছে সুখ, বিনাশি যাতনা।

1. 世界主要国家

(গান)

(১)

তোমার কুসুম-কাননে যখন গাহিয়াছিলাম গান,
তখনো ছিল যে নিশার স্বপন
উষার ছায়ায় আলসে মগন,
নয়নে তোমার ছিল যুগধোর, জাগেনি তখনো প্রাণ ।
তার পরে যবে স্বপন ভাঙ্গিয়া
ফুটিল প্রভাত কিরণে রাঙ্গিয়া,
তখনো কর্ণে শুনিলে কেবলি বিহগের কলতান ।
গেছে ডুবে দিন, আসিছে আঁধার ;
এই সাঁঝে আজ গাহিব আবার ;
মরতে প্রীতির এই শেষ গীতে সঙ্গীত অবসান ।

(২)

(আমি) সুখের ভরা বহিয়া এনে দুখের ঘরে রাখি ।

দুঃখ আছে বসিয়ে কাছে,

সুখেরে তবু ডাকি ।

শৈলে, বনে, গগন-পটে,

সাগর-তলে তটিনী-তটে,

সুখমা হেরি কুসুমে যবে ফুটিয়া হাসে শাখী,—

(আমি) শ্বাসের ঝড়ে- ভগ্ন ঘরে

সে শোভা নিয়ে থাকি ।

সুস্বনেতে সমীর ধায়,

মৃদুল কলে ঝরণা গায়,

সুধার ঝরা বহিয়া যায় গাইলে বনে পাখী ;

(আমি) তীব্র দুখে- তপ্ত বুক

সে সুধা এনে মাখি ।

মধুর স্মৃতি, প্রীতির রাগে

চিত্র করা মেঘেতে জাগে,—

ফুটিয়া ওঠে মানস পটে মোহন ছবি জাগি ;

(আমি) রোদনে-ভিজে আঁখির নীচে

সে ছবি ধরে রাখি ।

(৩)

(আমি) পাখীর মত উড়ে যাব বন-বহনে ।
শিশির ধোয়া পাতার পরে,
তুষার ছোঁয়া হাওয়ার পরে,
ছড়িয়ে দেব পাখা দুটি দুঃখ-দহনে ।

বিজন বনের তরু লতায়

ফুল ফুটিলে গাব ব্যথায় ;

উঠবে কেঁপে গীতি-ধ্বনি শূন্য গগনে ।

(সে গান্) যত ভেসে যাবে তত গাব সঘনে ।

আকাশ-তলে বাতাস-ভরে

মুঞ্জরিত তরুর পরে -

(মোরে) দেখে যদি ভাব, অধীর সুখ-বহনে,

(এসে) দেখো আমার বক্ষ ভাঙ্গা দুঃখ-সহনে

(৪)

ব্যথা মরামি ? কথা সরমে—কেন গো,
পুষি বুকে শ্বসিয়ে সারা ?
আঁখি পাতা সুকোমল ঢেকে রাখে ঝরা জল ;
বিজনে নয়নে বহে ধারা ।
শ্বসিছে পবন ওই তব দুখে, করুণায় ;
শীতলিতে ঝরে কর, সুধাকর-ঝরণায় ;
আমি কেঁদে গাই গান, প্রীতি দিয়ে ঢাকি প্রাণ ;
তবু কি রহিবে সুখ-হারা ?
বিনোদিনু মৃদু হাতে পরশি' কপোল-তল,
সরায়ে বাঁধিয়া দিনু উড়ে পড়া কুন্তল,
জল ভরা দুটি আঁখি চন্দনে মেখে রাখি ;
নাচে নাকো তবু আঁখি-তারা !

(৫)

সাজায়ে এনেছি আজি এ বিজনে তোমার পূজার ডালি ।
গেছে সারাদিন সেধে সাধনায়,
পোহাল যামিনী কেঁদে বেদনায় ;

(সেই) দিবসের শ্বাস, নিশার অশ্রু, এস গো চরণে ঢালি ।

স্বরভিত ধমে পুড়িছে কামনা,
প্রদীপ্ত শিখায় ছলিছে ভাবনা,

(মম) তাপস মানস জাগিছে দীর্ঘ জাগরণ-ব্রত পালি ।

আজি এ নিভূতে তোমার পূজায়
লহ সুখ দুখ বোঝায় বোঝায় ;

(তব) চরণ-প্রান্তে ঢালিয়া সকলি হৃদয় করিব খালি ।

—————

世宗本紀

(গান)

(১)

মম যৌবন আজি এসেছে রে ফিরে জীবনের তীরে, মরি রে !

নব বাসন্ত কুসুম কান্ত, হাসিছে কানন ভরি রে ।

কিসলয়-তলে ঢুলিছে মুকুল,

বৃকে পরিমল চাপায়ে ;

গাহিয়ে আবার গাহিতে ব্যাকুল

পাখীরা, কুঞ্জ ছাপায়ে ।

আজি সরস, সচল, দীপ্ত চিত্ত, অবশ আমি ত নহি রে ।

পুরানো বাসনা পড়েছে ঝরিয়া

নতন পাতার নিশ্বাসে ;

গিয়াছে জীর্ণ জরা ত মরিয়া—

অমৃত প্রীতির নিশ্বাসে ।

মলিন কান্তি উজলি' কিরণ, ঝলকে আমার শরীরে ।

অধীর কণ্ঠ উল্লাসে গায়

সঙ্গীতে সুখ কাঁপায়ে ;

অধীর চিত্ত উৎসাহে ধায়,—

(ওগো) পড়িবে কোথা সে কাঁপায়ে ?

আমি প্রীতির বক্ষে কুসুমের মত পড়ি সুগন্ধে ঝরি রে ।

(২)

কেন এত ভাবি। রে ভাই ? দুঃখ তোমার থাকবে না ।
গড়িয়ে পড়ুক অশ্রু যতই, একটী দাগও লাগবে না ।

জাগ্ছে বাথা মাথা তুলে—

বাঁধন ভেঙ্গে বুকের কূলে ?

ব্যথার-বেথী তোমায় ছুঁলে, আর সে ফিরে জাগবে না ।

বসন্ত যে সবার তরে—

ঘুরে আসে পরে পরে ;—

তোমার ঘরেও আসবে ; শুধুই নিদাঘ তোমায় তাপবে না

দুঃখ, বিষাদ, যাবেই যাবে ;

খোঁজ যারে, পাবেই পাবে ;

গলা-ভরা সাধাসুরে বারেক তারে ডাক দেনা !

কোথায় সে জন, পাওনা ভাবি' ?

(ওই) আস্ছে নিয়ে সোণার চাবি,—

খুলবে বুকের রুদ্ধ তালি, বন্ধ করেই রাখবে না ।

(৩)

আর খুঁজিবে সুখের বারা, ভোরের আলো সঁঝের ছায়ায় ।

উৎস গেছে খুলে বুকে তোমার হাসি তোমার মায়ায় ।

তোমার আঁখির দৃষ্টি পড়ে,—

আর ডরিনে বর্ষা ঝড়ে ;

যাক না শরৎ, যাক বসন্ত, চাইনে তৃপ্তি ফুলে, হাওয়ায় ।

তোমার নামে প্রাণের পরে

বহে সমীর, পুষ্প ঝরে ;

তোমার প্রীতিই চাঁদ মাখানো শিশির জলে আমায় নাওয়ায় ॥

(৪)

উড়্‌ব আমি ঐকাশপথে, তোমায় বুকে জড়িয়ে ।

হ'লে ক্লান্তি, ভাঙ্গ'ব শ্রান্তি মেঘের উপর চড়িয়ে ।

যায় না সেথা পাপের দৃষ্টি,

বৃষ্টি-ধারে ধূলা ধোয়া ;

শূন্যতলে, মেঘের কোলে,

বহে কেবল শীতল হাওয়া ;

(মোরা) সেই আকাশে, সেই বাতাসে থাক'ব পাখা ছড়িয়ে ।

নেয়ে-ধুয়ে জলের কণায় -

জলদেরি চাপে গো,--

শুকিয়ে নেব আবার পাখা

উর্দ্ধপথের তাপে গো ।

(তথা) খেল'ব কত আলোর খেলা, কিরণ মাঝে গড়িয়ে ।



(৭)

আসছে ভেঙ্গে চোখের পাতা সুখের পরশে ।
সুদূর হতে যাদুর বলে
প্রবেশি' আসি হৃদয় তলে,
প্রীতির দেহে, অতুল স্নেহে, বুলায় কর, সে ।
স্বপনে যেন গলিয়া চূমে
চেতনা পড়ে ঢলিয়া ঘূমে ;
জাগায় শেষে, কুসুম পিয়ে অঙ্গ-পর সে ।
লুটায় আঁখি সরস-রস-সঙ্গ পরশে ।
চাহিনে আমি-- অতনু-নতা
মোহিনী অতি সুতনু-লতা,
প্রীতিতে শুধু জড়ায় প্রীতি অমিত হরষে ।
মুদিয়া আসে চক্ষু, মধু-জড়িত পরশে ।
ভাসিয়া এসে মধুর গীতি
ঝরিয়া পড়ে সরমে নিতি ;
গীতির সাথে মাখানো ঘন পীরিতি বরষে ।
আসে রে ভেঙ্গে চোখের পাতা সুখের পরশে ।

一、研究目的

প্রার্থনা ।

দেবি !

জীবন তুচ্ছ করিতে শিখাও, জীবন করিব ধন্য ।

সকলের আগে সেবিত্তে চরণ,

স্থির অনুরাগে লভিতে মরণ,

সেবকবর্গ মাঝারে আমারে কর গো অগ্রগণ্য ।

জয়-পরাজয়, মান-অপমান,

না গণিয়া মনে হব আশ্রয়ান,

তীক্ষ্ণ প্রহারে বক্ষেতে ক্ষত লভিব তোমার জন্য ।

শুনি পুরাকালে হইল যখনি

বীরের শোণিতে সিক্ত অবনি,

—কে পারে গণিতে— সে শোণিতে কত জনমিল বীর সৈন্য ;

আজিকে আমার রুধির ধারায়—

তোমার চরণ-তলের ধারায়

দেখি জাগে কি না, লভিয়া শক্তি নবীন ভক্ত অন্য় ।

পঞ্চকমালা ।

লভিতে শিখাও ভীষণ আঘাত,
বহিতে শিখাও অসৌম বিষাদ,
সহিতে শিখাও ফুল্লবদনে যাতনা দুঃখ দৈন্য ।
বুলায়ে চরণ-ধূলি এ মাথায়,
ভুলায়ে তোমার মহিমা-গাথায়,
জীবন তুচ্ছ করিতে শিখাও, জীবন করিব ধন্য ।

নব প্রভাত ।

(১)

নমি তব পদে আজি এ প্রভাতে ;—
প্রবেশিব নব জগত-সভাতে,——

শুভ্র পূণ্য-বসন অঙ্গে

পরিয়ে দে মা ।

করিয়ে আশিস্ শিরে উষ্ণীষ

জড়িয়ে দে মা ।

(২)

কর্মের পথ রুধিয়া আমার

দাঁড়ায়ে উচ্চ জড়তা পাহাড় ;

ঠেলিয়া চরণে সে বাধা বিষম

সরিয়ে দে মা !

আছে তার পর নিরাশা সাগর—

তরিয়ে দে মা ।

(৩)

পুণ্য সমরে হইব যাত্রী,
দেহ গো শস্ত্র জগত-ধাত্রী ;

প্রীতির ধর্ম্মে অটুট বন্দ্য

গড়িয়ে দে মা ।

ভূণেতে আমার

শর সাধনার

ভরিয়ে দে মা !

নব বর্ষে ।

হে মৃগয়ী জন্মভূমি, আপন হাতে স্নেহে তুলি'—
মাথিয়ে দেও অঙ্গ ভরি আশীর্বাদী পায়ের ধূলি ।
আজ্ বছরের প্রথম দিনে, তব নব সেবা-ব্রতে
নিজে তুমি দীক্ষা দিয়ে চালাও মোরে লক্ষ্য পথে ।
সহ্য কর্ব কঠোর পীড়া, তুচ্ছ কর্ব পেটের জ্বালা ;
প্রীতির সেবায়,—হাসির শোভায় মলিন বদন কর্ব আলা ।

ব্যর্থ হলেও যত্ন, ফিরে স্মার্থপুরে আর যাব না ;
সিদ্ধিকল্পে কন্মসঁপি, কর্ব ব্রত উৎসাপনা ।
তীব্র রক্ষ্ম দুঃখ যদি ঘনিয়ে আসে অতিরিক্ত,
দিব তবু ভক্তি পুষ্প আঁখির বাস্পে করি সিক্ত ।

সন্ধ্যা যবে আসে আশুক ঘনঘটায় ছেয়ে আকাশ,
বহে বহুক্ দম্কা বেগে ঝন্ঝা ভরা কালের বাতাস ।
বিশ্বপ্রীতির সাধনাতে চল্ব ঘড়ির কাঁটার মত ;
বন্ধ যবে হবে, হবে ; থাকবে ভবে সেবাব্রত ।

জালিয়া রোঁদ্রে হোমের অনল,
দ্বিজ ও শূদ্রে দেহ গো কুশল-

দীক্ষা ;

দীপিয়া প্রেরণা প্রাণের রন্ধে ,
দেহ গো নূতন বেদের মন্ত্রে

শিক্ষা ।



শারদ প্রভাতে ।

১

গিরি, বন, নদী রঞ্জিয়া রবি,

ফুটায় ধরায় সুহাসি ।

হেরি সে ফুল প্রভাতের ছবি,

প্রবাসে চিত্ত উদাসী ।

এ প্রবাস-বাসে মানস-নেত্রে

নেহারি তোমারে বঙ্গ !

সমতল ভূমে ধান্যক্ষেত্রে

স্নিগ্ধ উজল অঙ্গ !

২

নাহিক এমন তটিনী তথায়

উপলে হরিত চরণা ;

ভূধর প্রান্তে তরুর ছায়ায়

নাচে না এমন ঝরণা ।

নাহিক বঙ্গে নিবিড় বিজন

বিশাল বনের গরিমা ;

তবু প্রেমভরে করি গো পূজন

সে সুখ শারদ-প্রতিমা

৩

ভূষিয়া পদে কুমুদে অঙ্গ

সাজ গো সরসী বঙ্গে ;

কাদামাখা জলে তোল তরঙ্গ

বঙ্গ-পাবনী গঙ্গে !

ঢুলাও ধরণী, হরিৎ বসন,

গাহ বিহঙ্গ প্রভাতে :

শেফালি গন্ধে আমোদি ভবন

এস উৎসব ধরাতে ।

৪

আজি গ্রামে গ্রামে নগরে নগরে

জাগেরে সুখ আনন্দ ;

হেথায় পবন, বহিয়ে আনরে-----

দূর উৎসব-গন্ধ ।

রঞ্জি প্রবাস, ওগো কল্পনে,

মানস-আলোক-শোভাতে

বঙ্গ-মাধুরী এ দূর ভবনে

বিকাশ শারদ প্রভাতে ।

କୋଡ଼ିଏ ଅକ୍ଷର ।

কাল দুটি তারা ।

সে চোখের কাল দুটি তারা !
সেই চমকভরা উজল্ চোখের কাল দুটি তারা !
দুটি কি পাখীর ছানা,
ছড়িয়ে কোমল্ ডানা—
সঘনে পাতার দোলে দিচ্ছে পাখা নাড়া ?
নয়নের রেখার ঘেরে
ঝলকে নেচে ফেরে ;
গায়ে কি বস্বে উড়ে ? পোষা পাখী তারা ?
যখনি ভুলি' নাচে—
খাঁচাটি পাত্তি কাছে,
বসে সে উঁচু গাছে ! বনের পাখীর বাড়া !
ডেকে গায় কভু ছলে,
—নারবে কথা বলে !
এগুলোই পাতার আড়াল ! পাইনে কোনো সাড়া ।

রাজা ঠোঁটের হাসি

লুক্ক মনে শুনি, কথা কানে ভুলিনে,
রাজা ফুলের পাঁপড়ি নেহারি ।
মুগ্ধ হয়ে থাকি সদা, গানে ভুলিনে ;
চেউ গুণি ও ঠোঁটে তাহারি ।

নাউ গগনে মেঘের ছিটে, চাঁদনি যামিনী ;
বায়ু খেলে আলোএ লুটিয়ে ।
সেই গগনের মাঝে ফুটে ছোটে দামিনী,
বিধুমুখে মধু ছিটিয়ে ।

লক্ষ হাজার চুমো খেয়ে তবু কি জানায় ?
ঘুমায়নাকো ঠোঁটের কোলেতে !
গিট্‌গিটিয়ে থাকে চেয়ে শুয়ে বিছানায়,
অঙ্গ দোলায় ফুলের দোলেতে ।

মিষ্ট রসে পুষ্ট রাজা ওষ্ঠে অধরে

হাসি এসে বাসা বেঁধেছে ।

সৃষ্টি জোড়া পরাণ্ ভাঙ্গা ভৃগু যত রে


আমার ঠোঁটে ঢেলে কে দেছে ?

দৃষ্টি ফেল পরাণ্ মুখো কেন তুমি গো ?

ছট্ফটিয়ে মরি হরষে ।

ঠোঁটের কোলের হাসিটুকু এস চুমিব,—

মানা যদি অঙ্গ পরশে ।



যুদ্ধ ।

(১)

গোঁড়ের বোঁটায় দোলে ফুটে রাস্মা হাসির ফুল ;

আমি এসে পুষ্প চয়নে,—

ভুলে খালি ফুলের পানে চাই ।

ঝলক্ ভরে তরল্ আলো ছাপিয়ে পাতার কূল

উছলে পড়ে উজল্ নয়নে ;

সেই আলোকে নেয়ে ধুয়ে যাই ।

ঝরে দেদার সুধার ঝরা গীতি-ধ্বনিতে ;

ঝর্ণা কূলের বাতাস লাগে গায়,—

ছিটে কোঁটা মধু-শুধু-পাই ।

ফুলে' ফুলে' ওঠে জোয়ার, রূপের নদীতে ;

দূলে দূলে তরী ভেসে যায় ;

কূলে কূলে আমি ছুটে ধাই ।

(২)

জালে পড়া পাখী আছি পাখা ছড়িয়ে,—

কাঁটা-গাঁথা আটা-মাথা পাশ ;

দাঁড়িয়ে দূরে দেখছ শিকারী ?

যেতে হুকুম দিচ্ছ, বাঁধন পায়ে জড়িয়ে ?

এ যে বেজায় নিষ্ঠুর পরিহাস !

উড়তে নারি, কচ্চি স্বীকার-ই ।

টোপ্ গিলেছি লোভে পড়ে, উগ্গরে ফেলা দায় ।

দিঠির জোড়া বঁড়শি বিঁধেছে ।

মজা তোমার মাছের বেপারি ।

হেঁচকা টানে মাছ-খেলালে কণ্ঠা ছিঁড়ে যায়,—

বোঝেনা, যে খেলায় মেতেছে ।

এই দুনিয়ার এন্নি বেভার-ই !

(৩)

প্রাণের দখল্ চাইনে, কেবল মুষ্টি ভিখারী,—

তবু কেন দোরে ফেলে যাও ?

প্রেম-নিধি থাকুক ভাঁড়ারে ।

চাইনে প্রেমের জমিদারী ; গরিব বেচারি---

খুসী হব, যদি মোরে দাও

দুটি দানা আঁচল্ ঝাড়ারে ।

পঞ্চক মালা ।

তৃপ্তি আমার, মুগ্ধ প্রাণে কাটিয়ে দেওয়া দিন ;

মন্ মজাতে নেইক মনের সাধ

জীবন-ভরা থাকুক বাঁধারে !

বসি রূপের সিংহাসনে, বাজিয়ে প্রেমের বীণ্

সুরের নেশায় করে দিয়ে মাৎ,

বিশ্ব রাখ মোহে বাঁধারে ।

অনুরোধ ।

তুমি রহিও না

চেতনা-ডোবানো বেদনা জাগায়ে চাহিয়া ;

তুমি কহিও না

খিন্ন জীর্ণ লুপ্ত কাহিনী, গাহিয়া ।

করুণা-তরল-বরষা-লিপ্ত-

চাঁদের কিরণে ক্ষিপ্ত চিত্ত ;

সঙ্গীত, করে বিষাদে সিক্ত

সুর-তরঙ্গে নাহিয়া ।

তুমি দহিও না

পিপাসু করিয়া উপাসে শুষ্ক কণ ;

তুমি লহিও না

প্রীতি-রঞ্জে রক্ত অধর গণ্ড ।

ঝলকি উঠিলে রূপের অনল,

জমানে! এ প্রাণ হবে রে তরল ;

প্রবাহে বহিবে দুখের গরল

ছড়ায়ে বিষের গন্ধ ।

পঞ্চক মালা ।

তুমি সহিও না

যুগযুগান্ত-সঞ্চিত ভার, সরলে !

তুমি বহিও না---

পাষণ মাথায়, অসিতে ব্যথায়, অবলে !

সরমের মত নরম বোঁটায়

স্বপ্ন-স্মৃতি কুসুম লোটায় ;

নীরস শৈল কভু কি ফোঁটায়

কঠোর বক্ষে কমলে ?

ললিতা ।

উষার তাপে রাঙ্গানো, আর

তুষার চাপে জমানো তার

ননীর ডেলা শরীরখানি

যতনে টানি যখনি ধরি,---

দুখের তাপে কঠোর চাপে

গলিবে বলি অমনি ডরি ।

অনিলে যেন তুলার খেলা,

সলিলে যেন শোলার ভেলা,---

ললিত চাপে দলিত তমু

অতলে যেন তলিয়ে যায় ।

স্বপন সম কোমল কম

পরশ লাগে গলিয়ে গায় ।

গুরু ।

শিশুর মতন নিত্য প্রফুল্ল সরল,
যুবকের তীব্র বীর্যে উৎসাহে অটল,
সাধনা, ধীরতা, জ্ঞানে, মনীষী প্রবীন ;
ধর্ম-পথ-যাত্রী সুধী, তুমি চির দিন ।
রমণীর ভুক্তি প্রাণে, শক্তি পুরুষের ;
সেবা অনুরক্ত তুমি সদা স্বদেশের ।
যৌবনে বৈরাগ্য সাধি' লভি' সেবা-ব্রত,
ব্রহ্ম--পাদ--পদ্ম--গধু' পানে হলে রত ।
কল্পনা, লেখনী, চিন্তা, কর্ম সমর্পণ
করিয়া ভারত-পদে, পবিত্র তর্পণ
করিলে মঙ্গল-কল্লে । তুলি' করে ধরি,
অন্ধে দেখাইলে পন্থা ; পুণ্য বর্ম পরি'
যুকিয়া পাপের সাথে, হ'লে জয়ী বীর ;
তব জয়ে জন্মভূমি আজি উচ্চ শির ।

কবি ।

সরস বাস্কে,

করিছ সৃষ্টি

ছেড়েছে চাদর

পাছে দণ্ড

শুধু কি হাসাও ?

রূপসী নবীনা

তাপেতে তপ্তা

কুড়িয়ে সে ধন

‘ইরা’ গুণবতী

প্রীতির দেহের

হাসির রস্কে,

বিপুল বঙ্গ-মজলিশে—

বচন মিষ্টি ;—

আম্রশ্রেষ্ঠ ফজলি সে ।

বিলাতি বাঁদর,—

হচ্ছে তাদেরো সুখ্যাতি ;

যতেক ভণ্ড—

চণ্ডী, নন্দ, ইত্যাদি ।

কাঁদিয়ে ভাসাও, —

পাষণে বসাও চিহ্ন ;

পাষণী প্রতিমা—

রচিবে কে তোমা ভিন্ন ?

সে অভিশপ্তা,

কাঁদিলে মুক্তা ঝরে ;

সতীরা এখন

হারের রতন করে ।

করুণা মুরতি,

‘দৌলত’ সতী-রত্ন,

পরান “মেহের”,

ঢালিছে মোহের স্বপ্ন ।

ওগো ও মিত্র,	অঁত পাবিত্র
বিবিধ বর্গে	তোমার চিত্র-তুলিকা ।
জড়তা যুক্ত	স্মরতি পর্গে
নব ভানু-তাপ	এঁকেছ পুণ্য-কলিকা ।
‘চারণীর’ গীতি	চেতনা-লুপ্ত---
নাচায়ে ফিরায়ে	আঁধারে স্তপ্ত মহীতে,—
হাসিয়ে হাসাও,	প্রসারি’ প্রতাপ,
বিভব-গরবে	আনিল প্রভাত চকিতে ।
রহি পবিত্র	‘মানসীর’ প্রীতি
বিবিধ ছন্দে	যেন রে বিজুলি-কণা,—
	শিরায়ে শিরায়ে
	নবীন উদ্দীপনা ।
	কাঁদিয়ে কাঁদাও,
	শৌর্য্যে মাতাও প্রাণ ;
	অক্ষয় হবে
	এ ভবে তোমার গান ।
	সরস নিত্য,
	ভুলিয়ে বিরহ-বাধা,
	মধুরে মন্দ্রে
	গাহ দ্বিজেন্দ্র, গাথা ।

সন্ন্যাসী ।

অন্বেষিছ হে সন্ন্যাসী, ভস্ম মেখে গায়
পরম চরম সত্য । দলিয়াছ পায়
মর-লিভবের মায়া ; কি অমর পণ !
অরবিন্দ সম কাঙ্ক্ষি, তরুণ জীবন,
কঠোর সাধনা ব্রতে করিতেছ ক্ষয় ;
সহি ক্লেশ, দৈন্য সদা মুখ গ্লান নয় ।
দুঃখ যত পেষে, ত্রুত চন্দনের মত
সুরভি অধিক তব নিঃসরে সতত ।
হেলায় এড়ালে ক্ষুদ্র জগতের কারা ;
ছিন্ন শৃঙ্খলের গ্রন্থি । আনন্দের ধারা—
ঢালিছ ভারত-ভূমে । দেব মহেশ্বর,
কর এ সন্ন্যাস-ধর্ম আলোকে ভাস্বর ।
সে আলোকে শত শত যুবক ভারতে
করি স্নান, নেবে দীক্ষা, নব সেবা ব্রতে ।

ঋষি ।

প্রশান্ত অন্তরে বসি, হে ঋষিপ্রবর,
অফুরন্ত ক্লান্তি-হীন উদ্যত উদ্যমে
কি ফুলে জ্ঞানের পুষ্প বিকশি' সুন্দর—
সে ফুলে আমৃত-পান করিছ সংযমে ।
ভোগ-সুখ তুচ্ছ করি, নিত্য চিন্ত ভরি
অক্ষয় অমূল্য নিধি করিছ সঞ্চয় ।
সে রত্ন যতনে তুলি' দিলে উপহারি ;
ধন্য তাহে জন্মভূমি । তুমি বিশ্বময়
ঘোষিলে দেশের খ্যাতি, আলোকি' কিরণে
অতীত বিস্মৃত তার গৌরব অমল ।
ক্ষুদ্র এই স্তুতি-পুষ্প লবে কি চরণে ?
এ নহে সুরভি-স্নাত প্রফুল্ল কমল ।
কৃপা করি উপহার লইলে বহিব
অসীম আনন্দ প্রাণে, চরণে নমিব ।

দেবী ।

ঝলকে লাবণ্যে তব দীপ্তি মহিমার,
শুচি শোভে হসিত বদনে;
সংঘমে যৌবন বাঁধা শ্রীঅঙ্গে তোমার,
বিশ্বপ্রীতি উদ্ভিন্ন নয়নে ।
আছে অঙ্গ, তবু হেরি, তুমি অশরীরী ;
রূপে রাজে অরূপ অব্যয় ।
সঞ্চরে অন্তর মম শ্রীচরণ ঘিরি’;
কর প্রীতি অমিত অক্ষয় ।
করুণা ঝরিছে লোকে অধর-স্পন্দনে;
শুনি বাণী, ভক্তিসুতা ধরা ;
প্রীতিতে বিজিত বিশ্ব । বিজয়-বন্দনে
নত শির, ক্ষিতি ও অমরা ।

१। पञ्चमः अध्यायः ।

(প্রবাসী-সম্পাদক লিখিয়াছিলেন :—“শ্রীযুত বিজয় চন্দ্র মজুমদার
মহাশয়কে জ্যেষ্ঠের প্রবাসীর সূচীতে ‘প্রোঢ়’ বলা হইয়াছিল ।

তিনি তাহার প্রতিবাদ করিতেছেন) ।

(১)

পেঁচিয়া কথা বলে রুঢ় বুঝতে পারি ; নইক মুঢ় !

ঠারে ঠোরে ‘প্রোঢ়’ শব্দে বুড়া বলে চোখ টেপা !

চাপা হাসি পিষে দাঁতে আঙ্গুল নেড়ে ইসেরাতে,

নেলিয়ে দিয়ে চ্যাংড়া ছেলে দিচ্ছ লুকুম,—“খুব খেপা ।”

আমার যে ছাই বয়স্ বেশী, সাক্ষী কি তার পক্ষ কেশ-ই ?

এত নাচি এত হাসি, সে সব কি গো ফক্কিকা ?

প্রাণটা দিচ্ছে হামাগুড়ি, কিন্না হাওয়ায় উড়ছে ঘুড়ি ;

দোষটা তবু ক’রে বাহির, কচ্ছ জাহির মক্ষিকা !

(২)

ভাবো কি গো, চিরজন্ম ছিল আমার গায়ের চর্ম্ম

এন্নিধারা কালের হাতের লাঙ্গল দিয়ে চাষ করা ?

না হয় নাইবা ছিলেম কার্তিক, কিন্তু শোনো ওগো তর্কিক,

সুঠাম ছিল অঙ্গ আমার, কাঠাম ছিল ঠাস-গড়া ।

শিরায় ছিল উষ্ণ রক্ত, (এটা নয়কো প্রত্নতত্ত্ব),

গণ্ড ছিল মাংস ভরা, দন্ত ছিল সার-বাঁধা ;

পা ছিল না তিলের ডাঁটা— শিরে তোলা বেজায় ফাটা ;

ঘন কালো গোঁপের তলায় ছিল হাসির হার গাঁথা ।

(৩)

হায়রে সেকাল ! আমায় লোকে বুড়া বলে যাচ্ছে বোকে !

দুনিয়াতে দেখলেম মজা হাজার রকম আজ্জুবি !

যম বেটা সে মুদ্দফরাস্,— স্বয়ং পেলেন্ বুদ্ধ তরাস্—

আমার অঙ্গ এত ভঙ্গ, সেই বেটারই কারচুপি ।

ওরে রে ডোম্ ওরে চণ্ডাল, (হার মেনেছে গথ্ ভেণ্ডাল !)

ভেস্ে দিলি ঝাঞ্জাবাতে সাধের কুঞ্জ যৌবনের !

সতেজ শ্যামল আশার তরু, এত শুকনো, এত সরু ?

ধূলায় গড়ায় ঝরা পাতা ; এই কি ভাগ্য ঐ বনের ?

(৪)

যাক্গে কথা মিছে ভাবাই ; কিন্তু কেন তোমরা সবাই

আদর করার ছলে এসে দিচ্ছ কোসে কান্‌মোলে ?

উড়্‌ল যমের এক তুড়িতে সবি আমার ! গুড়্‌ গুড়িতে

একলা বারি-সিক্ত-প্রাণে স্নিগ্ধ ডাকে গান্ তোলে !

মরি লোকের দেমাক্ হেরে ! (ওরে হরে, তামাক্ দেরে !)

শাঁপ্ দিচ্ছি অগ্নি ছুঁয়ে,—বল্বে যারা “ঐ কথা,”

তাদের যেন নাতির নাতি খেপায়, বলে “বুড়া হাতি ।”

আমিও জানি দাদ্ তুলতে ! বল্বে যে যা, সেইব তা ?

জ্যৈষ্ঠ ১৩১৬ ।

বিরহে ।

মূৰ্খ আমি, সূক্ষ্ম প্রেমের করি মিছাই দাবি !
প্রাণটা আছ প্রাণে গুঁজে, তবু তোমায় পাইনে খুঁজে ;
দূরে আছে দেহখানা এতেই বেজায় ভাবি ।
পটের উপর কালো দাগে ছবির ছায়াই ভাল লাগে ;
ছায়াশূন্য প্রীতির আলো হারায় আঁখি-তারা ;
রংএর আলো চক্ষে ভরি' আমি তোমায় লক্ষ্য করি ;
সত্য কিছু বুঝি নাকো আস্ত ফাঁকি ছাড়া ।
কথার চেয়েও মধুর, রামা ! প্রমাণ হচ্ছে অধর রাঙ্গা ;
চিঠির চাইতে দিঠির ভঙ্গি হ'ল শেষে প্রিয় ।
অতিরিক্ত হবে যখন দেহাতীত প্রীতির কখন,
ঠোকা মেরে আমার গালে মুচুকে হেসে নিও ।
ঐ সুযোগে দিও চুলোয় ফাঁকা যত 'খিওরি' গুলোয় ;
বোলো অঙ্গাতীত সত্য, শুনবে লক্ষ্য হিদের্ ;
বুঝিয়ে দিও বারম্বার— বসন এবং অলঙ্কার,
বৃদ্ধি করে অনুরাগ, নারীর পক্ষে নিদের্ ।
প্রমাণ কোরো খোঁপা নেড়ে (আমি যাব বোকা মেরে)
দেহের বর্ণ স্বর্ণ ভূষায় উজল্ করে গাঁটি ।
বুঝ্ আমি,—নারীর ফুল দীপ্তি বাড়ায় সা দীর মূল্য ।
প্রীতির তব্বে গীতার অর্থ একেবারে মাটি ।

পুরুষসিংহ

(হাস্য ব্যতিরিক্ত নবরসের রচনা ;)

অদ্ভুত ।

অক্ষক্রীড়া ঘটায় ব্রীড়া, কিযে তা বলোনা !
দিনটা ভোর করিয়া শোর, সতের পোলনা !

বীভৎস ।

মেজাজ্ গেল বিগ্ড়ে তাহে মুস্ড়ে গেল প্রাণ ;
ভঙ্গ খেলা ; সিং হ বার গৃহেতে ফিরে যান ।

রৌদ্র ।

প্রবেশি গেহ কহিল—“কেহ দিবে না কি গো ভাত ?”
“এসেছ ঘরে ?”—গিনি তাঁরে কহিল দৈবাৎ ;
“খেলিলে পাশা ক্ষুধা পিপাসা যায় না মিটিয়া ?”
আর কে দ্যাখে ? দাঁড়াল বেঁকে সিংহ চটিয়া ।

ভয়ানক ।

কহিল রাগি’—“দেশ-তেয়াগী হইব এখনি ।”
গৃহিণী শুধু মৃদুল মধু হাসিল তখনি ।
বস্ত্রগুলি গুছিয়ে তুলি’ পোঁটলা বাঁধিয়া,
চলিল বেগে বেজায় রেগে গোঁপেতে তা দিয়া !”

আদি ।

এগিয়ে এসে গিন্ধী হেসে ধলে সে গুলি,
একটি হাত প্রসারি নাথে রাখিল আগুলি ।

বীর ।

ক্রোধে অধীর হৈল বীর, কথা না মানিল ;
বেজায় জোরে আঁকড়ে ধরে বোঁচকা টানিল ।
হ্যাঁচকা টানে বোঁচকা নিতে মট্কে গেল হাত ;
ছট্কে পড়ে’ সিংহ যেরে ভূমিতে চিৎপাৎ ।

করণ ।

অঙ্গে ব্যথা ! সিংহ কথা কহিছে কাতরে—
“হলেম খুন্, হলুদ চুন্ আন্তে যাতরে !”
দুচারি-ঘটি জলের ছিটা, পাথার বাতাসে ;
হলুদ-চুন-পটির গুণে তুলিল মাথা সে ।

পঞ্চক মালা ।

বাৎসল্য ।

ঝাড়িয়া দিল গায়ের ধূলা হস্ত বুলায়ে,
রহিল তবু সিংহ বাবু ওষ্ঠ ফুলায়ে ।

শান্ত ।

দিলেন আনি গৃহিণী তাঁরে পথ্য খালাতে ।
যতেক খান্ আবার চান্, ক্ষুধার জ্বালাতে ।
হাঁড়িটি বেশ করিয়া শেষ, গুড়াকু ফুঁকিয়া,
ধূমে ও ঘূমে সকল গোন্ গেলরে চুকিয়া ।

তাড়াতাড়ি ।

জিনিষ পত্র বাঁধা ছাঁদার গোল্ উঠল বাড়িতে ;
যেতে হবে খেয়ে দেয়ে, ধেয়ে রেলের গাড়ীতে ।
নাকে মুখে গুঁজে ছুটি, ছুটে গেলাম ফেসনে ;
হুকো বুঝি গেছি ফেলে ! কাহার কথা কে শোনে ?
পেয়ে একটি বন্ধু তথা, গেলাম কথা কহিতে,—
উঠল বেজে মেলের বাঁশী, আর কি পারি রহিতে ?
জিনিষ গুণে, হেঁচড়ে টেনে তুলতে মাত্রে ঠাঁপিয়ে,
চল ছুটে গাড়ী দ্রুত, শরীর শুদ্ধ কাঁপিয়ে ।

খামল গাড়ী ; তাড়াতাড়ি তবু মোরে ছাড়ে কি ?
চ্যাচামেচি কল্লে মিছে, কাজের গৌরব বাড়ে কি ?
যাসনে ছুটে ওরে মুটে, একটুখানি দাঁড়ারে !
গোলেমালে হারিয়ে গেল সন্দেশেরি ঠাঁড়ারে ।
সাজিয়ে জিনিষ গাড়ীর মাথায়, উঠিতে না উঠিতে,—
এত মড়া—তবু ঘোড়া লাগল বেজায় ছুটিতে ।
জলদি কেন গাড়োয়ান ? ঘোড়া তোমার মর্নের যে ।
ঘণ্টা ভাড়া পাবে, তবু তাড়াতাড়িই করবে হে ?

তুমি যাচ্ছ তাঁড়াতাড়ি, আমি ধীরে শ্বশ্বে ;—
অর্থটা তার একটুখানি তলিয়ে যদি বুঝতে !
সবুরে যে মেওয়া ফলে, সেকথা কি সত্য নয় ?
কিলিয়ে যে কাঁঠাল পাকাও, সেইটি খালি পথ্য হয় ?
জীবন তত্ত্বের হ্রস্ব দীর্ঘ একেবারেই ভুলে হে ;
শত যুগ ত শত বর্ষ, শতেক ফোঁটা কুলে হে !
শিথিল কর পায়ের গতি, এবং কোমর-বন্ধ ।
শুয়ে শুয়ে গ্যাজ্টি নাড়া, কাজ্টি নহে মন্দ ।

দোষ নিজের নয় গো মা ।

(“দোষ কারো নয় গো মা”র সুরে)

দোষ নিজের নয় গো মা ।

- (আমি) খোদার খোঁদা খানায় পড়ে মরি শ্যামা ।
- (হায়রে) সঙ্গী দোষে নাটক দেখেই পড়া আটক,
এবং আড্ডা ফেঁদে সেধে সা ধা গা মা ;
- (তাহে) হ'ল মাথা খারাপ খেয়ে পরের সরাপ ;
বেচতে হ'ল শেষে পুঁথি ধুতি জামা ।
- (ওগো) ছিল না তাঁর কসুর— চাকরি দিলেন শশুর,
কিন্তু কলম্পিশে আপীসেতে ঘামা—
পোষাল না ; ওসে পূর্বজন্মের দোষে
তাড়িয়ে দিল সাহেব ; কুড়িয়ে নিলেন্ মামা ।
- (পরে) বহু কষ্ট ভুগে দাসীর ঘরে ঢুকে,
বাক্স ভেঙ্গে নিলেম্ সোণা রুপা তামা ;
- (হায়রে) শীলতা ভুলি সে দিলরে পুলীশে,
- (পোড়া) গ্রহ-দোষে ক্ষমা করিল না বামা ।
- (পাড়ার) সঙ্গী গুলোর দোষে, শনি গ্রহের রোষে,
পূর্ব জন্মের পাপে, বিধির শাপে শ্যামা, —
- (এখন) মাথায় করে বই— তারা ব্রহ্মমই !
- (ভব-) কারাবাসে এসে যা-তা ধামা ধামা ।

କେଶବ ମହାପାତ୍ର ।

খেয়াল ।

বিশ্বখানি সৃষ্টি য়ার, তিনি কি খেয়ালি ?
নহিলে কেন জগৎ ভরা কেবলি হেঁয়ালি ?
খেয়ালে এসে খেয়ালে যায়—সুখের পরে দুখ,
ঋতুর পরে ঋতুর লীলা, যুগের পরে যুগ ।

খেয়ালে গীতি গাহে ভারতী মানস-সর-মাঝে ;
চরণ দোলে বীণার তালে,—কমলদল নাচে ।
সুরের সাথে চরণ-পূত সুরভি আসে ছুটে ;
খেয়ালে তাই কাব্য-লীলা পুলকে ওঠে ফুটে ।



সুরনারী ।

ভুঁয়ে নেমে

মোরে ছুঁয়ে যাও ;

শুকনো ডালে উঠবে ফুটে ফুল ।

একটু থেমে

মুখ্ নুইয়ে চাও,

বুকের কোলে ছড়িয়ে এলো চুল ।

অধর খানি

কাঁপিয়ে গীতি গাও ;

দূরের কথা শুনব কালা কাণে ।

মুখের বাণী

ফুটেবে, যদি দাও

তৃপ্ত হ'তে বিন্দু মধু-পানে ।

ফুল্ ফোটানো

দীপ্তি চোখে মাখি,

আমার পানে যদি থাক চেয়ে,—

বন্ধ হেন

অন্ধ দুটি আঁখি

উঠবে ফুটে, দিবা আলো পেয়ে ।

পরীর মত

চলে যেতে দূরে

যাওগো যদি আঙুল্ ঠেরে ডাকি,—

আকাশ-পথ

লজ্জি যাব উড়ে ;

বিনা পাখায় পঙ্গু হবে পাখী ।

মেঘের মত

দোলাও নীলাঞ্চল—

ঢেলে বুকের তরল প্রেম-কণা ;

ঝরবে কত

গরুর মাঝে জল,

উষর ক্ষেতে ফলবে কাঁচা সোণা

ভালবাসি ।

প্রাণ-ভরে তায় ভালবাসি,—দেখিনিকো কভু চোখে ।
আমি বলছি খাঁটি কথা,—বুঝবে নাকো তবু লোকে !
ভাব কিগো, আঁখির কোমল পাতার তলার চাউনি বিনে,
কোনো জন্মে কোন মানুষ প্রাণটা কারো নেয়নি চিনে ?
ভাব কিগো, প্রেমের ফুলটি ফোটে খালি রূপের বোঁটায় ?
প্রীতির সরু অঙ্গখানি, চুম্বনেরি রসে মোটায় ?
গুণের একটা দোহাই দিয়ে, রূপে খ্যাপে চোদ্দ-আনা ;
দু-আনা বাদ মানুষ ভবে, দেখতে পাচ্ছি বন্ধ কাণা ।
সেই দু-আনার মাঝে হচ্ছে একটি পয়সা আমার ওজন ;
তুমি বলছ,—ঘষা সেটা ? বোঝে প্রেমের ব্যাপার যে জন
আমার মূল্য তারি কাছে । দেখিনি তায় কভু চোখে ।
যাচ্ছি খাসা ভালবেসে, বুঝলে নাকো তবু লোকে ।

শারদা ।

বয়সা গেছে উড়িয়া মদ-মত্ততার ;
হরষে আছে ফুটি বিশদ চিত্ত তার ।
চমকি নাহি বলে দামিনী, বারবার ;
কনকময়ী মূর্তিখানি শারদার
স্নিগ্ধ ভাতি বিতরে প্রেম-মহিমার ।
মৃগ মনে পূজি শ্রীপদ প্রতিমার ।
জলদে—

জলের কণা ছলকে না ;
চল-বিজুলি ঝলকে না

অনল-বরণে ।

শরদে—

শুভ্র অতি অভ্রদল

খেলিছে তুলি, স্নানিস্মল

শ্যামল গগনে ।

ছায়া ।

চেয়ে থাকি তার আঁখি পানে,---

দৃষ্টি যেন লেখে দীপ্ত লেখা ।

নিয়ত নৃতন হয় মানে-

যত পড়ি রেখা পরে রেখা ।

ওকি গো কোমল অনুরাগে

আত্মমগ্ন সংযমের ছায়া ?

সন্ন্যাসিনী ? ওই যেন জাগে

আসক্তি-কামনাময়ী জায়া ।

উছলিয়া কপোল অধর

সুধা টলে কাঁপিতে কাঁপিতে :

যেন শুদ্ধ করুণার ঝর

ছুটিতেছে বিশ্বটি প্রাণিতে !

ক্ষুদ্র মোর বক্ষের উপর

ঢালি ধারা আদরে নিভতে,

সৃজিবে কি স্বচ্ছ সরোবর

পরিপূর্ণ প্রীতির অমৃতে ?

বিলম্বিত কুন্ডলের ভলে

শিখ ছায়া পড়ে কার ভরে ?

অঙ্গ-লগ্ন ও চাক অঞ্চলে

লেগে বায় কোণায় সঞ্চরে ?

ফুল সরোজিনী-পরিমল,—

ওকি খালি ফুলেরি গৌরব ?

অত তাজা সুরঞ্জিত দল,—

পীত শুধু লেপিয়া সৌরভ ?

প্রতিকৃতি, ছায়া দিয়ে আঁকা ;---

তাই নিয়ে ধ্যান করি একা !

সুদৃঢ়তায় প্রাণখানি ঢাকা ;

প্রতিবিন্দু বলে রূপ-রেখা ।

রেখাপরে ছায়া করে খেলা ।

তারপর ? আমার কল্পনা ।

অন্ধকারে ডুবে যায় বেলা,—

আলো ঢাল, ললিত-ললনা ।

বছর চলে ।

বছর চলে

বর্ষা জলের

চলের মত ;

কিন্মা ধলায়

পায়ের ঠেলায়

Ballএর মত ।

কালের বায়ু

দোলায় আয়ু

নলের মত,—

পল্কা শাখায়

কিন্মা পাকা

ফলের মত ।

চলছে শরীর

বটে ঘড়ির

কলের মত,

কিন্তু যমে

ভাঙছে ক্রমে

খলের মত ।

প্রাণটা, মস্ত

দীর্ঘ প্রশ্ন

Hallএর মত ;

কিন্তু উদাস্

শূন্য আকাশ

-তলের মত ।

সেখায় যে যে

গেছে, ভোজের

নদী-কূলের

কিন্মা লুপ্ত

থাকতে হবে

শুক তরু

আস্তু সেজে

Dollএর মত,

বাজি গোছের

ছলের মত,—

ঝরা ফুলের

দলের মত ;

-স্বপ্ন-ভুক্ত

ফলের মত !

তবুও ভবে

কলের মত,—

কিন্মা মরু-

স্থলের মত !

